

**Naalakkersuisunut apeqquut: Nunaqarfinni umiatsianut annerusunut aammalu aalisariutitut annerusunut usingiarfiusinnaasunik tulattarfinnik 40 fods tungaanut angissusilinnik pilersitsiortornissamut Naalakkersuisut pilersaaruteqarpat? Aammalu qanoq annertutigisumik misissuiffigineqarnikuuppat?**

(Inatsisartunut ilaasortaq, Jakob Skade, Kattusseqatigiit Partiiat)

**Akissuteqaat.**

(Ineqarnermut, Attaveqarnermut Angallanermullu Naalakkersuisoq)

Aallarniutigalugu Inatsisartuni ilaasortaq Jakob Skade, Kattusseqatigiit Partiiat, apeqquuteqaataa, nunaqarfinni tulattarfiit pitsanngorsarneqarnissaannut pilersaarutitut attuumassuteqartoq pillugu qutsaviginiarpara. Apeqquuteqarnermi maannakkut pissutsit atuuttut tunngavigalugit nassuiaateqarnissamut, tamatumalu peqatigisaanik suliniutit maannakkut ingerlasut ingerlanneqartussallu pillugit ilisimatitsinissamut periarfissaqalerpunga.

2006-imi ukiakkut ataatsimiinnermi taamanikkut Inatsisartuusut "Umiarsualivinnik annertusaanissamut nassuiaat" suliaaraat, tassanilu Kalaallit Nunaanni umiarsualiviit annerusut annertusarneqarnissaat aallunneqarneruvoq. Nassuiaat taanna naapertorlugu suliaasanut tulleriaarneqartunut ataasiakkaanut aningaasalersuisoqassappat, sanaartukkat ilaat atuinikinneruffiullutik naammassineqarsimasussaapput taamaatinneqavissimasussaallutilluunniit. Maannakkorpiatq pissutsit tunngavigalugit ukioq kingulleq sanaartugassanut taamaatinneqarsinnaasunut imaluunniit atuinikinneruffiullutik naammassineqarsinnaasunut aningaasaliisoqarsimanngilaq.

Naalakkersuisut attaveqarneq tamaat annertuumik pingaartillugu suliaaraat. Taamaattumik Assartuinermit Isumalioqatigiissitamik, Namminersorlutik Oqartussat aningaasaqarnikkut imminut nammassinnaalernissaq anguniarlugu piffissamut ungasissumut anguniagaat tunngavigalugit Kalaallit Nunaanni assartuinermit takorluukkanik aammalu takorluukkat taakku qanoq iliorluni piviusunngortinneqarsinnaanerit takussutissianik suliaqartinneqartussamik pilersitsisoqassaaq. Tamanna pissutigalugu illoqarfinni nunaqarfinnilu umiarsualivinnik alliliinissat nutarterinissallu pillugit isumaliutersuutit suliamut tassunga ilaatinneqassapput. Assartuinermit Isumalioqatigiissitap suliaminik 2009-mi ukiap ingerlanerani aallartitsinissaa aammalu 2010-mi juunimi naammassinninnissaa naatsorsuutigineqarpoq.

Kalaallit Nunaanni umiarsualiviit angisuut kisimik aallunneqarnissaat naammangitsoq ilisimaaraara, taamaattumillu aamma takornariaqarnermut annertusiartortumut sumiiffiillu ilaanni aalisarnerup annertusineranut ullumikkut misigisatsinnut atatillugu pisariaqartitsinerup paasiniaaffigineqarnissaata pisariaqarnera eqqumaffigaara. Tamanna pissutigalugu ullumikkut misissuinnissaq taamaattoq siunissamut ungasissumut assartuinermit politikki, aammattaq umiarsualivinnut suliaasanut, assartuinermit isumalioqatigiissitaalersussami suliarineqartussanut tunngasunik imaqartussaq suliaasanut ilaatinneqassaaq.

Taamaattumik nunaqarfiit ataatsimut isigalugit umiarsualivinnik alliliinissamut Naalakkersuisut aalajangersimasunik pilersaaruteqanngillat, kisiannili Nunap Karsiata

aningaasaqarnikkut pisinnaasai malillugit umiarsualiviit ingerlaavartumik nakkutigineqarput, aserfallatsaalineqartarlutik nutarterneqartarlutillu.